

四庫全書

史部

欽定四庫全書

史部

硃批諭旨卷二百十七之四

詳校官尚書臣德保

編修臣袁謙覆勘

總校官中書臣朱鈐

校對官助教臣蔡鎮

謄錄監生臣段文新

欽定四庫全書

硃批諭旨卷二百十七之四

硃批石麟奏摺

雍正十年二月初六日山西巡撫臣石麟謹

奏為奏

聞晉省得雪日期事竊照晉省各屬地方上年十月得雪深透之後十一月以至今歲正月內雖各屬屢經得雪但僅及一州一邑未能普徧霑足臣

心日切徬徨深自警惕昨欽奉

上諭更深恐懼修省并預為籌酌平糶等事今荷蒙

穹蒼上鑒

聖心之乾惕下憐萬民之生命省城於二月初五日申
時雨雪竝降入土三寸有餘仰瞻雲色深沉降雪
必不止一二處晉省地氣多寒今歲時令較遲得
此雨雪深有濟於二麥臣已飛查各屬得雪之情
形但覆到尚需時日臣伏知

聖心垂念之切謹將省城得雪緣由繕摺先行恭
奏其餘俟各屬查覆到日再具奏

聞謹

奏

覽晉省雨雪情形朕心深為欣慰

雍正十年三月初五日山西巡撫臣石麟謹

奏為奏

聞事竊照山西省城於二月十九日得有瑞雪隨據各

府州縣陸續申報是日各得雨雪二三四五六寸
不等并有至八寸者均獲普霑在地麥苗咸有裨
益茲又於三月初四日戌時起至初五日丑時止
得雨三寸有餘沾濡優渥四郊徧及詢之野老農
夫俱稱應時甘雨一切禾黍正可趁此播種歡呼
載道莫不感頌

皇仁除即行查各屬俟覆到另

奏外合先繕摺奏

聞上慰

宸衷謹

奏

覽奏曷勝額慶近京一帶地方亦節次據報得雨雪矣

雍正十年三月十八日山西巡撫臣石麟謹

奏為奏

聞事竊照山西省城三月初四日得雨情形經臣恭摺

先行具

奏一面行查各屬去後隨據各府州縣陸續申覆初四初五日各得雨雪二三四五寸不等均屬得濟臣正在繕摺間省城於初十日得雪八寸十一日又得雪欠餘十分霑足復即查據各屬申報初十十一日各得雨雪七八寸一尺及一尺四五六七寸不等雪後天氣晴和消融入土優渥深透高原下隰通省地方咸獲霑足上年所種之麥無不青蔥暢發目下應種之麥并一切禾黍亦皆得及時

播種齊全野老農夫徧滿田疇歡呼力作咸頌
皇仁所有晉省雨雪霑足緣由謹再奏

聞謹

奏

據奏通省雨雪霑足實慰朕懷

雍正十年四月初六日山西巡撫臣石麟謹

奏為欽奉

上諭事竊臣前接到內大臣公豐盛額字開欽奉

上諭令於所轄兵丁內俱著勤加演習步行及本身裹帶物件之法多多益善不可視為具文苟且從事將來若不能諳練將該管大臣官員從重議處欽此欽遵臣隨知會太原大同兩鎮臣於所轄兵丁內挑選演習并將奉行緣由先卽具摺回

奏茲查太原鎮各標營路內經署鎮臣張朝良挑就兵丁共一千八百名大同鎮各標營路內經署鎮臣李如栢挑就兵丁共五千五百七十四名至臣

標除額外兵丁已經全數製給沙囊演習外其左
右二營內挑就兵丁一百六十名通共挑就兵丁
七千五百三十四名俱各製給沙囊令其繫於腰
間兩腿勤加演習由輕漸重由近漸遠臣仍不時
督察務期諳練合將挑就兵數恭摺奏

聞謹

奏

練習步行趨捷之法須當由漸加增非可急驟之事知

此要訣而時加督察方為有益

同日又

奏為奏

聞事竊照山西於三月二十七八兩日省城得雨四寸
餘并據各府州縣陸續申報二十七八兩日各得
雨三四五六寸不等正在繕摺具

奏間茲省城於四月初四至初五日霖雨大霑十分
深透霑足雨水調勻且天氣和暖在地麥苗得此

膏澤滋培更加茂盛而播種之禾黍亦皆勃然暢
發所有連得時雨情形理合繕摺奏

聞謹

奏

覽所奏情形朕實深為晉民額慶

雍正十年閏五月二十四日山西巡撫臣石麟謹
奏為奏

聞事竊照晉省地方於五月初六十六二十二四二

十八九等日暨閏五月初二十一十二等日各屬
俱得雨二三四寸不等茲省城十八日得雨五六
寸十九日甘雨大霑十分深透霑足隨據各府州
縣申報十八十九等日各得雨二三四五六寸不
等通計省北各府州屬雨水俱屬霑足省南各府
州屬霑足者十居八九其一二未霑足者雨澤時
有地土亦皆濕潤二麥已漸次登場收穫未黍亦
俱種齊暢發正在繕摺具奏間省城又於二十三

日得雨三寸當茲盛夏甘霖疊霈普利田疇皆由

聖德感召以致萬民樂業臣惟欽遵

實能如是居心方不愧為民上
聖訓益加兢惕仰承

天庥以副我

皇上惓惓民生之至意為此恭摺奏

聞謹

奏

當茲盛夏連得甘雨西望晉省不禁以手加額

欽定四庫全書

硃批諭旨

七

同日又

奏為欽奉

上諭事竊查雍正九年十一月初六日准兵部咨開奉
上諭山西大同總兵官徐起鳳著來京大同總兵員缺
著肅州總兵官張朝良調補大同總兵事務緊要且
近有挑選兵丁之事張朝良未到之先著李如柏暫
行署理其太原總兵官印務著石麟委員署理張朝
良到晉時著石麟酌量或令張朝良徑赴大同之任

或李如柏在大同辦理之事未竣卽令張朝良暫署太原總兵印務欽此移咨到臣臣隨欽遵

諭旨將太原鎮印務卽委鎮標中軍遊擊胡海護理嗣於雍正十年正月鎮臣張朝良到晉因鎮臣李如柏在大同辦理召募兵丁挑選安設等事未竣臣遵

旨酌量令張朝良暫署太原總兵印務俱經

題明在案今查大同召募安設等事已經告竣則鎮

臣李如柏張朝良自應

題請各回本任第臣查大同地處邊方時值軍務絡繹鎮臣李如柏署印半載有餘調度有方辦事勤敏於營伍公務均有裨益目今召募兵丁雖已事竣尚有整理邊口製造軍器及辦送軍營火藥旗幟等項均當料理查鎮臣張朝良自署理太原鎮印務以來訓練辦事俱屬誠實熟諳惟是大同地方營務較之太原殊為遼濶殷繁若初到彼地諸

務未能一時深悉辦理不無稽遲臣因營伍地方
公務起見仰懇

聖恩可否令兩鎮臣仍各暫行署理兩鎮印務俟大同
各項事竣之後再行酌量

題請各回本任伏乞

聖主訓示遵行謹

奏

各令暫署兩俱有益所奏是

雍正十年七月初一日山西巡撫臣石麟謹

奏為欽奉

上諭事雍正十年四月初九日准戶部咨各省督撫提
鎮標下兵丁蒙

皇恩賞給生息銀兩一案雲南貴州廣東廣西四省已
數分給協營兵丁均霑欽奉

上諭著各省督撫等酌量本地情形悉心籌運若可以
照此變通辦理則協營兵丁可以蚤受恩賞誠屬有

益但各省地方之利息輕重不同餘銀之多寡不一
非以不能行之省分令倣行之也不可勉強從事欽
此欽遵仰見我

皇上一視同仁

睿慮周詳之至意臣查山西省雍正七年五月內蒙

恩賞給撫標兵丁銀四千兩提標兵丁銀六千兩又於

雍正八年九月內蒙

恩賞給大同鎮標兵丁銀九千兩均各營運生息在案

查臣標銀兩係省城當商情願具領營運每兩出息一分二釐因營運之後即有調遣車兵及赴甘兵丁而生息尚未豐裕是以先就出征兵丁家屬遇有吉凶事者賞給除給發銀共三百十四兩外尚存息銀一千二百四十八兩復據各當商情願再領息銀一千兩營運照前加息按交於本年四月初一日給領從此每月又多增息銀十二兩所有存營兵丁臣擬於今年四月為始遇有吉凶事

者即將息銀動用賞給正在繕摺

奏明間欽奉

上諭著將賞給生息銀兩酌量辦理欽此臣隨咨會太
大兩鎮臣各就本地情形公同籌酌可否即得分
給協營兵丁蚤受

恩賞去後茲准暫署太原鎮臣張朝良咨覆查惠濟銀
兩所得一分利息除賞給出征車騎暨赴甘出征
馬兵家屬吉凶之事外今止現存利銀四百五十

八兩餘銀實屬不多若勉強通融勢必兩不相就此時似難分給協營兵丁等因又准暫署大同鎮臣李如柏咨覆查大同地處邊疆不通舟楫貿易各商獲利實微惠濟銀兩分借各舖領運每兩僅交息銀一分因利銀不豐酌議先令標下三營車騎赴甘出征兵丁家屬遇事給賞其存營兵丁俟利息豐裕再為開賞咨明戶部在案今查現在止存利銀六百五十四兩此時似難概行開賞等因

各咨覆前來伏讀

上諭原令不能行之省分不可勉強從事諄諄

聖訓固已洞鑒靡遺今太大二鎮標

恩賞生息之銀實與滇粵四省利廣而可數分給者不

同至於臣標二營現存利銀僅止三百五十兩請

將標下新添額外兵丁二千名於癸丑年為始遇

有吉凶事亦照存營兵丁之例一體給賞以廣

皇仁所有各協營兵丁此時尚不能分給似應俟生息

充裕之日臣等當酌量請

旨遵行臣謹一併恭摺覆

奏伏乞

睿鑒謹

奏

原命汝等酌量施行自不應勉強從事

雍正十年七月十二日山西巡撫臣石麟謹

奏為恭報二麥收成事竊照晉省二麥茲當收穫之

際據各屬開報分數前來查山西共一百六州縣
今十分收成者二十三州縣九分收成者十一州
縣八分收成者二十六州縣七分收成者二十三
州縣六分收成者二十三州縣野老農夫咸稱上
冬今春雨雪稀少麥收幾致難望荷蒙

聖主念切民生頻

頒修省之

訓誥屢

欽定四庫全書

硃批諭旨

卷二百七十四

十三

諭先事之圖維是以

至誠感召雨雪疊霽二麥得濟獲此收成莫不歡欣感

激仰頌

皇仁臣謹按各屬所報分數欽遵

諭旨分別開明據實另繕清摺恭呈

御覽為此謹

奏

覽奏二麥收成分數朕懷曷勝欣慰

雍正十年九月二十五日山西巡撫臣石麟謹
奏為欽承

聖訓恭謝

天恩并據實陳明事竊臣庸材陋質荷蒙

聖恩畀以晉撫重任復

命署理提督印務受事以來凡於題補將備等員一一
會同鎮臣詳加揀選再三考核不敢稍忽緣晉省
於請定武職陞選等事案內則有應改補之都司

於遵

旨議奏事案內則有三七分缺應題補之將備又於欽

奉

上諭事案內有沿邊各營應題補新添設之營員臣於
所轄標營各員內疊次挑選無如難得合例之員
祇就各員中酌量人地相宜現在勤慎營務弓馬
可觀以及著有勞績者公同揀選題補恭候

欽定前將千總劉朝棟題補茹越營守備續將改補各

都司之守備劉文秀黃澍祚馬圯受米虎馮選梁
永壽等節次送部引

見兩蒙

皇上飭諭臣跪讀之下惶悚靡已伏念臣知識淺短揀
選人員未能允協蒙

聖主不加處分頻頒

訓誨臣感愧交深難以名言嗣後如遇員缺更當詳慎
揀選以仰副

聖主訓誨之至意但臣更有陳明者查大同鎮屬守備
應改都司者共十七缺臣於本年四月內揀選具
題經部議覆奉

旨俞允補授之外計有十二員應送部引

見臣前具題疏內聲明分作兩起咨送今除劉文秀等
六員已經奉

旨在案又除原題頂補梁永壽員缺之守備田重時今
梁永壽仍回原任田重時毋庸送部外尚有任起

龍尚崇傑顧晉珍李進朝張夢麟五員今次應送

部引

見查部議任起龍係合例之員尚崇傑顧晉珍李進朝
張夢麟部議俱越銜一等而李進朝又係本省人
均令送部引

見恭候

欽定臣查尚崇傑顧晉珍李進朝俱原係專營守備臣
考驗才具俱與新銜相稱是以即請改補原營都

司張夢麟現係新平路中軍守備臣考驗該備老
成歷練弓馬可觀因請調陞保德營都司至任起
龍弓馬雖屬平等但從前屢經出征因著有勞績
現以署都督僉事管殺虎協中軍守備事是以即
請改補該協都司以上各員係未奉

聖訓之先於本年四月內具題在案今除給咨送部引
見外臣既感蒙

聖主訓誨之諄切又深懼揀選之未當謹恭摺叩謝

天恩并將從前酌量題補緣由據實陳明謹

奏

朕用人原只論材技從不拘限成例雖然材優而合例者上也材優而不合例者次也若材劣而又不合例斯為下矣豈宜濫入保題乎如此不但用非其人是乃開汝等督撫自作威福之權尤為不可觀汝此奏未悉朕旨所以復行批諭令汝知之

同日又

奏為恭報

盛世豐年收成分數事竊照晉省地方夏秋雨澤足
田禾暢茂當茲百穀咸登之候據各府州縣陸續
開報收成分數前來查晉省共一百六州縣前惟
據芮城縣詳報縣境內有十三村莊得雨稍遲田
禾被旱臣當將情形

題報在案嗣據委員詳稱履畝確勘所有補種之莊
麥因雨後天氣和暖俱已長發結實獲有收成已

經另疏

題覆外今共計十分收成者六十四州縣九分收成者十四州縣八分收成者十八州縣七分收成者九州縣六分收成者一縣臣謹將各屬所報分數遵奉

諭旨分別開明另繕清摺恭呈

御覽伏乞

睿鑒謹

奏

以手加額覽焉

雍正十一年正月二十八日山西巡撫臣石麟謹
奏為奏

聞事竊查晉省地方上冬雨雪稀少今時屆仲春東作
將興仰望膏澤正殷之際荷蒙

聖主至誠感召省城於正月二十七日酉時起大雪續
紛至二十八日丑時止四野得雪四五寸不等隨

降隨融入土優渥不特在地之麥苗深獲滋培即
耕耘播種均屬有濟且是夜同雲密布雨雪綢繆
所降必廣臣伏念雨雪關乎年歲屢厪

宸衷若待各屬報齊尚需時日除一面飛行飭查覆到
另行具

奏外謹將太原省城得雪情形卽先恭摺奏
聞上慰

聖懷為此謹

奏

省城得雪情形欣悅覽之各屬曾否普遍霑濡查明具奏以聞

諭山西巡撫石麟布政司蔣洞知悉阿齊圖前自京起程時應給馱載之馬不過二十餘匹今歸途行裝增至四五十馱之多沿路騷擾驛站經直隸陝西皆據實叅奏而汝二人竟忍掩蔽朕聰隱嘿不言是可忍也孰不可忍也思之實為寒心況驛馬關係緊要豈汝等任意

應酬情面之物耶接諭後將阿齊圖於山西境內曾受何員餽送所得何物如何索取情形一一察訪的確併汝等贈助贐儀若干悉據實開明奏聞以贖過咎倘仍執迷不悟巧為飾辭希圖遮蓋前愆恐終不能欺蔽朕之耳目也各訪各奏毋得會商汝二人若必欲商同奏覆朕亦難強任汝二人為之耳特諭

雍正十一年三月初六日山西巡撫臣石麟謹

奏為奏

聞事竊照晉省地方正月二十七八等日得過雨雪情

形經臣繕摺奏

聞在案嗣據各屬將二月十四十五二十三二十七等
日得雨緣由申報前來臣查省南各州縣各得雨
三四五六寸不等并有一尺餘者惟省北大朔寧
保四府州屬內有得雪三四寸者有得雨二三寸
者亦有尚未得雨者數處臣已飭令各加修省虔
誠求禱茲省城於三月初四日申時起天降霖雨

至初五日午時止遍查四野俱獲深透霑足麥菽
等項大有裨益且連日濃雲普徧甘霖稠密所降
必廣除行查各屬俟覆到另

奏外謹將各屬二月內所得雨雪竝太原省城現在
得雨情形恭摺奏

聞上慰

聖懷謹

奏

深慰朕懷

雍正十一年三月二十六日山西巡撫臣石麟謹
奏為奏

聞事竊照太原省城三月初四初五日得雨情形臣當
卽繕摺奏

聞并聲明行查各屬俟覆到另

奏在案嗣據各府州縣陸續申覆前來臣查省南各
州縣三月初四五日各得雨二三四五六寸不等

并有霑足者而蒲澤解三府州屬十分溥足又地
氣較之他處和暖麥苗蚤發得此甘雨現在暢茂
省北大朔寧保四府州屬三月初四五日各得雨
二三四五寸不等亦有霑足者臣謹將查明各屬
得雨情形恭摺奏

聞謹

奏

覽奏晉省得雨情形仍未經溥遍沾足月盡月初以來

光景若何更奏以聞

雍正十一年四月十三日山西巡撫臣石麟謹

奏為奏

聞事竊臣前將各屬三月初四五日得雨情形繕摺具奏欽奉

硃批諭旨覽奏晉省得雨情形仍未經溥遍沾足月盡月初以來光景若何更奏以聞欽此臣查太原省城於三月二十四日得雨寸餘隨據各州縣陸續申

報三月二十四五兩日各得雨二三四五寸不等
并有報霑足者其大朔二府屬十九二十得雨之
後二十五六兩日又得雨霑足者較之他屬尤多
而蒲州府屬地氣和暖雨水調勻優渥二麥現今
秀實惟是時當孟夏豆麥等項在在需雨今各屬
雖陸續得有雨澤但未獲普遍透足臣心切徬徨
隨於四月初七日設壇率同司道等官虔誠祈禱
至初十日省城得雨寸餘臣仍深自刻責修省現

在敬謹祈求仰冀

天鑒甘霖大霈普利田疇以上慰

聖主惓惓民生之

睿懷也謹將三月內各屬得過雨澤并現在祈求緣由

恭摺奏

聞謹

奏

覽

畿輔一帶於月之十六十八兩日得雨露透密通晉省
諒必已蒙

上天慈佑溥賜甘霖矣

雍正十一年五月初七日山西巡撫臣石麟謹
奏為

聖主之訓誨無已微臣之覺察有疎仰祈
睿鑒嚴加處分事竊臣一介庸愚感蒙
聖恩畀以撫晉重任屢荷

訓誨生成得以遵循有自夙夜黽勉殫竭心力惟冀有

益於吏治民生以仰報

高厚於萬一其於徵收錢糧辦理軍需尤加意督察諄

切申飭各屬員砥礪廉隅謹守法度不得濫加火

耗借端擾累如有違犯

賢哉封疆大吏如此方可謂不

負朕

之倚任稍有寬容此臣數年來兢兢如一日者也詎有大

同府知府王聯晉雖莅衝繁要缺事無貽誤但居

心實多巧詐昨旗兵起行之際乃敢假臣之名餽

送銀兩臣知之深為駭異隨即

題叅在案宣意分餽馬匹一案屢催尚未報銷乃竟

有朦混暗侵情弊所屬之員內亦有玩法營私縱

其如

役滋擾等事王聯晉恃其離省寫遠復敢徇隱臣

為其欺蔽

朕亦失於覺察被汝欺蔽何

今蒙

皇上命吏部侍郎臣任蘭枝署副都統臣佛凝莪至大

同查究審理以昭法紀但臣身沐

皇上至優至渥之恩而於此等劣員不能蚤為覺察實

深惶愧無以自容惟有跪請

聖主將臣

敕部嚴加議處以為不能覺察屬員者之戒臣謹涕泣
實陳曷勝悚慄之至為此謹

奏

悚慄何益涕泣更屬可笑此案審明之後罪之輕重有
無憲章自在豈因汝之奏請而或免或不免耶

雍正十一年六月初三日山西巡撫臣石麟謹

奏為奏

聞事竊照山西巡察臣周紹龍於雍正十一年五月初二日巡歷已週將印信送交新任巡察臣王珣接受任事在案五月十三日周紹龍自平陽回至省城公館是日晚間忽患痰迷之症臣聞知即往看視延醫調治尚未全愈茲於六月初二日接准移稱本年五月初四日在平陽具題報滿於十三日進省正在束裝復

命間不意途中感冒風暑是日忽患疾病頭目迷暈四肢無力現在延醫調理未能馳驛赴

闕緣係業經報滿不獲卽日起程移明查照等因到臣准此理合繕摺奏

聞謹

奏

調治大愈時然後起程毋令勉強就道

雍正十一年七月十五日山西巡撫臣石麟謹

奏為恭報二麥收成事竊照晉省自春及夏所得雨澤竝麥苗情形經臣節次繕摺奏

聞茲當收穫之際臣留心時加訪問并據各府州縣開報分數前來復逐一查核無異查晉省共一百六州縣今十分收成者二十二州縣九分收成者十六州縣八分收成者三十州縣七分收成者二十九州縣六分收成者九縣野老農夫咸稱上冬今春雨雪稀少荷蒙

聖主念切民生至誠感召三四月間甘雨疊沛二麥得
濟獲此收成莫不歡欣感激仰頌

皇仁臣謹按各屬所報分數欽遵

諭旨分別開明據實另繕清摺恭呈

御覽再查晉省各屬自五月至今雨水俱各調勻透足
在地禾稼極其茂盛現在吐秀結穗合并奏

聞謹

奏

覽奏二麥分數不禁以手加額稱慶晉省今歲猶得如此收成實出朕之望外

雍正十一年九月十三日山西巡撫臣石麟謹

奏為恭報

盛世豐年收成分數事竊照晉省地方今歲自夏至秋雨永均獲霑足田禾極其暢茂當茲百穀告登之候據各府州縣陸續開報分數前來臣復逐一查核晉省共一百六州縣今十分有餘收成者共二

十三州縣十分收成者共八十二州縣九分收成者一縣其永寧太平等州縣送驗田畝內所產五穗四穗三穗之瑞穀并有長一尺三四五寸不等之大穗嘉禾實穎實粟覩之深為歡忭野老農夫咸頌

皇仁含哺鼓腹共歌豐稔此皆我

皇上至誠感召上協

天心之所致臣惟欽遵

聖訓益加敬謹矢竭忠誠仰副

皇恩并勸諭百姓崇節儉廣積蓄以永享昇平之樂利
於靡已耳謹將各屬所報分數遵奉

諭旨分別開明另繕清摺恭呈

御覽為此謹

奏

今歲二麥之收已屬望外秋成又復如是豐稔朕欣慰
之懷曷可言喻我君臣當愈勉寅畏毋稍縱恣以仰答

上天之浩蕩洪恩耳

雍正十一年十一月十六日山西巡撫臣石麟謹
奏為欽奉

上諭事雍正十一年十一月十四日接到大學士伯鄂
爾泰寄字內開雍正十一年十一月初九日奉

上諭署太原總兵劉章從前在南贛總兵任時未能稱
職調令來京嗣因太原總兵印務需員署理一時未
得其人是以暫命劉章前往署理伊自到太原任後

於一切營務料理能否稱職之處可寄信巡撫石麟
據實奏聞欽此欽遵臣查署太原鎮臣劉章於本年
二月內赴任時經過省城臣見其為人尚屬老成
莅任之後時加查察訓練將士亦自竭蹶辦理近
聞操練雖勤但號令朝更暮改告誡寬嚴失當官
兵難以適從其於營伍事務究未能料理井井實
有裨益才具既屬中平而年力又漸衰老太原一
鎮素稱繁劇殊難勝任茲欽奉

諭旨查問臣謹據實奏

聞伏乞

睿鑒謹

奏

所奏是於朕旨未降之前姑且密之

同日又

奏為奏

聞事雍正十一年十一月十四日接到大學士伯鄂爾

泰字開大學士伯臣鄂爾泰謹

奏據王崇奏稱前因邊地緊要奉

旨添設官兵大同一鎮添兵五千餘名宣化古北二處
亦添兵五千餘名今古提宣鎮兵丁既經議裁則
大同一鎮應一例議裁等語查古北宣化大同等
處前議共添兵一萬餘名者原以備調遣之用今
既不需調遣且難招募精銳虛糜錢糧實屬無益
應請

密敕山西巡撫署提督石麟照總督李衛議裁直隸新兵之例酌量議裁具本請

旨一併交部議覆施行伏候

聖訓謹

奏雍正十一年十一月初十日奉

旨依議欽此欽遵并鈔錄王棠原奏封寄到臣臣查大同鎮屬沿邊各營路雍正九年十月於議奏添設兵丁事案內議令共添兵丁五千名當於雍正九

年十一月招募起至十年四月照數募補齊全飭令各營訓練已經造冊送部在案茲欽奉

諭旨令臣酌量議裁臣現在細加詳議裁減恭疏具題請

旨外理合將遵奉緣由謹先具摺奏

聞謹

奏

具題到日有旨

雍正十一年十一月二十一日山西巡撫臣石麟

謹

奏為奏

聞事雍正十一年十一月二十日據署澤州府解州知
州許日熾稟稱本月十四日有浙江語音自稱試
用官吳永清其人齎有諭帖一道錄呈憲電卑職
因與其人素未識面詢其來歷據云係由營田捐
納縣佐奉

旨發往山西以知縣試用九月到晉十月十五日奉撫
憲面諭今於

大計解部冊費派各府州協辦隨給諭帖差委催收
部費銀兩於十一月初二日自省起程由平定等
處而來又云伊係總督吳興祚一家吳總督之子
現任部郎有札專致憲案因此一到卽有此差并
奉密諭在外訪察等語卑職伏思憲臺撫晉數年
一切政務無不慎密且

大計一案亦竝無冊費名色屢蒙憲檄倘有藉名招搖之徒立即嚴拏詳究宜有差員催收冊費卑職深信斷無此事明係姦棍假捏招搖不敢疎縱除卽委員看守俟開戒日取供具文詳報外合先星馳稟聞等情并鈔假諭帖一紙到臣臣見之不勝駭異除飛飭署澤州府嚴審假捏情由詳解究擬并檄飭平定等處將有無經吳永清撞騙過情由亦卽據實詳報外謹先繕摺奏

聞并鈔錄假諭帖一紙恭呈

御覽為此謹

奏

何物姦徒輒敢如此膽玩真匪類也嚴審定擬具奏

雍正十一年十二月十六日山西巡撫臣石麟謹
奏為奏

聞事雍正十一年十二月初八日據澤州府鳳臺縣知
縣羅著藻稟稱卑職聞有京中人同騾夫隨從共

五人騎騾二頭於十一月二十四日到卑縣下町村廟內住宿口稱問梁淵要板卑職隨差役查問據稱有宛平縣公文一角投鳳臺縣又稱有王爺諭帖隨又委典史親往查問王爺諭帖再三索要方始取出內開本府為示諭事照得山西鳳臺縣民梁淵等進敬香柏木板大小八塊自備腳價運送至京今差烏林達齊其各至板所驗看果有此物卽便速運至府以應供用如無此物卽著烏林

達齊其各押解梁淵至府回話不得違誤以憑關防須至諭者右諭知悉雍正十一年十一月初十日行等語上用清字戳子硃標據稱係撥什庫發的至宛平縣公文一角係關提拐騾人犯與此事無干問其緣由稱從宛平順便稍來如此舉動甚屬可疑值知府因公赴省卑職隨稟明本府章同知本月初三日章同知卽親往查訊而本人俱不承認口稱諭帖已經燒燬又稱係蘇喇並非烏林

達前後互異隨於行李內搜出諭帖稿一紙上寫
鑲紅旗納親郡王老王爺諭地方關防事本府門
下買賣人梁淵薛隆節進敬香柏木板大小八塊
今差官烏林達趙住前往曲沃縣運解至京特諭
各府州縣關津不得攔阻須至諭者右諭地方知
悉雍正十一年九月日等語至硃標諭帖藏匿無
蹤初四日當經章同知將齊其各帶到縣城卑職
隨撥役嚴加看守事關旗人擅稱王諭合先稟明

等情到臣并據同知章廷珪稟亦相同臣見之不勝駭異正在檄飭該縣將齊其各等訊取確供詳報間十二月十四日又據澤州府同知章廷珪稟稱本月初四日查獲齊其各等業經具稟在案卑職隨將跟隨騾夫等四人細訊據常闢生供係陽城縣人向在京師騾行生理因梁淵欠騾行銀兩所以到梁淵家來討的據霍龍節供係陽城縣人因代梁淵借卽萬行銀兩是伊保借又與齊其各

素相認識所以同行再究平縣關文是原告楊虎
給伊轉給齊其各的據郎萬行供係陽城縣人同
霍龍節來與梁淵討銀子的據張立成供係趙城
縣人因齊其各霍龍節雇伊騾二頭尚欠騾價所
以跟著的等語今將查出姓名情由再行稟聞等
情臣查既據該同知訊明騾夫等姓名俱係山西
民人則齊其各明係棍徒妄行生事有干法紀除
飭鳳臺縣嚴訊確情並將趙住現在何處務須究

出倘該犯堅稱旗人不吐實情卽令解省發理事

通判究明另

奏外謹先繕摺奏

聞謹

奏

據奏旗人指稱王諭招搖晉省地方朕知諸王咸皆守法必無此舉自係假冒無疑若云已革退之納親郡王納爾素在伊則無不可為之事素行極其鄙猥不肯安

分自愛之人也當將獲犯研審確情定擬具奏以聞

雍正十二年正月十一日山西巡撫臣石麟謹

奏為奏

聞事竊照晉省於雍正十一年十二月二十八日省城
得雪五寸雍正十二年正月初一日寅時起瑞雪
續紛至午時止省城得雪五寸有餘并據各屬陸
續申報於上年十二月二十八日暨本年正月初
一日各得雪四五六七寸不等查三冬之內晉省

連得瑞雪普徧均霑不特在地麥苗深獲滋培而
土膏和潤將來春耕亦有裨益閭閻樂業農民歡
慶臣謹恭摺奏

聞為此謹

奏

覽晉省得雪情形朕懷深為欣慰

同日又

奏為

欽定四庫全書

殊批諭旨

卷二百十七之四

三十八

至德光昭甘泉疊見恭摺奏

聞事竊臣於雍正十一年十二月初一日據介休縣稟稱卑縣城南五里外上堡村地方舊有南泉灰泉長湖泉三處合流而為一渠經由上堡下堡常樂等三村共灌地五百餘畝數十年來三泉俱已乾涸水田悉成旱地忽於今秋收穫後三處復現微泉至十月而轉盛現今嚴寒冰凍尚爾日夜長流又南泉東面高地內新湧出泉一處其流尚細灰

泉西南平地內新湧出泉一處長湖泉西南平地內亦新湧出泉一處二泉甚旺其周圍附近處亦尚有湧出小泉等情具稟到臣復令將新舊各泉現在聚水寬深之情形及新湧成泉者確有幾處再加查明去後茲據稟稱查得南泉現在圍寬五丈水深一丈旁有新泉三處圍寬四五六尺不等水深各二尺灰泉現在圍寬一丈一尺水深三尺長湖泉現在圍寬四丈水深五尺與灰泉相接

旁有新泉三處圍寬五尺九尺一丈不等水深二尺五尺不等又附近有井一口向需人力汲引取水甚深今泉從井眼湧出亦充滿長流等情稟覆前來臣接閱之際深為慶幸此皆我

皇上湛恩普被

大德覃敷敬

天勤民時時以稼穡為念重農貴粟刻刻以安阜為心是以上格

蒼穹下昭瑞應甘泉疊見溥利民生臣與官民人等曷勝
歡忭感頌惟有益加敬謹以裕

天庥除飭該縣於春融後卽相度源流築堰疏引灌溉地
畝若干俟詳報另

奏外臣謹恭摺先具奏

聞謹

奏

地湧甘泉堪資灌溉乃生民樂利之休當具疏題奏興

築壩堰以垂永久及或建立祠宇以昭

神貺一併酌議施行

雍正十二年三月十二日山西巡撫臣石麟謹

奏為奏

聞事竊照晉省地方於本年二月二十八日省城得雨
三寸三月初五日得雨四寸初九日得雨三寸據
各州縣申報二月二十八九三月初五等日有各
得雨三四五六寸及霑足者臣查三春之內雨澤

甚是調勻周徧在地麥苗現高出四五六寸不等
農人俱各乘時耕耘歡聲徧野咸頌

皇仁臣謹恭摺奏

聞為此謹

奏

據奏三春雨澤調勻麥苗長發以手加額覽焉

雍正十二年四月二十八日山西巡撫臣石麟謹

奏為奏

聞事竊照山西地方今歲自正月以至三月雨水俱各
調勻充足經臣節次奏

聞在案嗣據各屬申報四月初一日得雨二三四五寸
不等并有霑足者其蒲解二府州地氣和暖麥苗
蚤發獲此雨澤尤為得濟二麥現俱吐秀結穗惟
入夏以來雨水漸覺稀少十八日省城得雨寸餘
二十二日又得雨一寸行查各屬十七八二十二
等日得雨一二三四寸不等有報霑足者亦有未

得雨者伏念時屆仲夏禾麥等項正需雨水滋培
今未獲及時均霑臣心切徬徨深自刻責修省現
在敬謹祈求仰冀

天鑒大沛甘霖溥利田疇以慰

聖懷謹將四月內得過雨澤并現在祈求緣由恭摺奏
聞謹

奏

京畿地方亦需雨甚殷朕正為此日夜焦憂亟當竭誠

修省以祈

天恩垂祐可也

雍正十二年七月十一日山西巡撫臣石麟謹

奏為奏

聞事竊照山西省城地方於六月二十五六日得雨露
足臣卽行查各屬去後茲省城又於七月初一初
二初四初五等日疊沛甘霖十分深透隨據各府
州縣陸續申覆前來臣查各屬於六月二十五六

日得雨露足者十居七八其餘得雨三四寸者續
於七月初一二初三四五等日均獲雨露足太汾二
府屬內從前少雨者亦皆普霑西成無虞查各屬
在地禾稼前此之已成植者暢茂倍常其漸次栽
種之蕎麥等項得此膏雨亦即勃然興發現在平
地之粟禾長有一尺八九寸至二尺五六寸不等
高地之粟禾長有八九寸至一尺五六寸不等平
地之高梁長有四五尺不等高地之高梁長有三

尺六七寸不等豆黍等項平地者長有二尺餘高地者長有八九寸及尺餘不等芄芄或或徧野青葱凡茲黎庶靡不歡忻臣謹將晉省得雨露足及禾稼現在長發情形一併奏

聞謹

奏

覽奏朕懷深慰但訪聞沿邊一帶朔平等處仍屬缺雨目今直隸宣郡與晉省北界接壤地方俱現在苦旱為

何竝未言及耶

雍正十二年八月初三日山西巡撫臣石麟謹

奏為欽奉

上諭事竊臣前具奏晉省得雨露足一摺欽奉

硃批諭旨覽奏朕懷深慰但訪聞沿邊一帶朔平等處
仍屬缺雨目今直隸宣郡與晉省北界接壤地方俱
現在苦旱為何竝未言及耶欽此欽遵伏查朔平一
帶地處邊疆氣候較遲本年四月當播種之時雨

澤稀少至五月初一二等日亦只各得雨二三寸
不等雨未透足二麥未能暢茂秋禾播種未齊嗣
於五月十四五二十二二十八等日得雨霑足秋禾
雜糧咸得播種惟因邊圉地方多係沙土若十日
或半月不雨卽覺乾燥故於五月底雖得雨霑足
而六月望後又需雨澤正在祈求旋於二十五日
得雨二三四寸不等復於七月初一二三等日連
得透雨優渥霑足查六月下旬得雨雖覺稍遲而

連霈甘霖禾黍均獲滋培興發是以臣於七月十一日同各屬霑足情由一併具

奏未敢以缺雨冒昧率陳也茲奉

諭旨查問臣謹據實覆

奏伏祈

睿鑒至各屬自七月初一二初四五等日得雨霑足之後省城於七月二十三十四日得雨霑足又於二十
六日得雨十分深透隨據各屬陸續申報七月十

九二十二十三四五等日各得雨三四五寸及霑
足不等其沿邊朔平府所屬之五州縣內右玉左
雲平魯馬邑等四縣於七月初十十九二十等日
俱得雨霑足朔州於二十四五日得雨五寸大同
府所屬之九州縣於七月十九二十二等日
均得雨霑足查各屬麥禾現在結穗晚禾等項亦
漸次秀實臣正在繕摺具

奏聞省城於八月初三日甘雨大沛四野霑足理合

一併奏

聞謹

奏

覽奏知道了凡雨暘奏報惟以據實爲要若少加粉飾
遮掩則心涉欺隱近於無恥小人之行矣戒之誌之

雍正十二年十月初三日山西巡撫臣石麟謹

奏爲恭報

盛世豐年收成分數事竊照晉省地方今歲三春雨水

到處充足入夏之後惟沿邊大朔保三府州屬暨
近省太汾二府屬內間有雨水未獲普霑者至六
月下旬七月初旬內甘霖疊沛通省普徧霑足田
禾仍屬得濟茲當百穀告登之候臣留心查察并
據各府州縣陸續開報分數前來臣復逐一查核
晉省共一百五州縣今十分收成者共三十六州
縣九分收成者共三十一州縣八分收成者共二
十四州縣七分收成者共十二州縣六分收成者

共二州縣黃童白叟羣相鼓舞感頌

皇仁此皆我

皇上敬

天勤民至誠感名以致萬姓得此盈寧之慶也謹將各屬

所報分數遵奉

諭旨分別開明另繕清摺恭呈

御覽為此謹

奏

晉省今歲秋成得有如是分數可謂望外之幸也

同日又

奏為欽承

聖訓恭謝

天恩事雍正十二年九月二十三日接准兵部咨開將

臣

題補鎮西城都司之馬自能渾源城都司之王哲朔

平營都司之楊國彥帶領引

見奉

旨馬自能王哲楊國彥俱弓箭生疎姑照所請補授石
麟凡題補武職多似此等人員是何意見爾部飭行
該署提知之欽此移臣欽遵跪讀之下惶悚靡已伏
思臣庸材陋質荷蒙
聖恩畀以晉撫重任復奉

命署理提督印務任事以來時時督飭員弁勤習技勇
整理營伍惟期殫竭駑駘之心力以報

聖主委任之

隆恩至於

題補將備等員尤深兢惕遇有員缺會同鎮臣詳加
揀選再三考核不敢稍忽祇緣知識短淺選擇未
當臣心深愧臣咎難辭乃蒙

聖主洪恩不加處分

特賜訓飭臣跪誦

恩綸實感愧交深難以名言嗣後如遇員缺益當詳慎

揀選以仰副

聖主訓誨之至意也所有微臣凜遵

聖訓感激之忱謹恭摺叩謝

天恩為此謹

奏

若詳加揀選再三考核之人尚皆如此平庸則通省武備廢弛將弁怠懈營伍之不整齊兵丁全未訓練不問可知矣惟愧惟懼庶免隕越慎之

雍正十二年十一月初八日山西巡撫臣石麟謹
奏為奏

聞事竊照山西省城十月十一十二日得雪情形臣當
即恭摺奏

聞并聲明行查各屬俟覆到另

奏荷蒙

睿鑒嗣省城於十四日未時起至十五日巳時止復得
雪六寸并據各府州縣陸續申覆於十月十一二

日十四五日各得雪五六七八九寸及一尺二三寸不等通省普霑在地麥苗得此瑞雪疊降均獲滋培之益所有查明緣由理合奏

聞伏祈

睿鑒謹

奏

覽奏闔境普霑瑞雪麥苗均獲滋培曷勝欣慰

雍正十三年三月十七日山西巡撫臣石麟謹

奏為欽承

聖訓恭謝

天恩事竊臣於雍正十三年三月十五日接到臣兄新

授福建按察使倫達理寄字內開我於三月初六

日奏請

聖訓蒙

皇上召進面奉

誤傳朕諭矣即從前亦有何嘉美之處不過僅能循分
上諭汝弟石麟居官不如從前竝不用心勉勵欽此恭

供職錄直省膺撫任者大都皆係汝等一流總不得人

奈何

諭旨并切加教導到臣臣跪讀

聖訓寶深惶悚伏念臣由筆帖式至微極末之員蒙
皇上天恩教養生成拔置

御前奏事

特授為員外郎旋放安徽布政司寸長未效仰荷
聖恩逾於常格

簡畀晉撫重任又蒙

命臣署理山西提督印務臣身受

殊恩至優至渥即捐軀糜頂尚恐不能報效何敢自甘
暴棄以蹈罪譴惟是才識短淺心思耳目不能周
到靡遺以致愆尤日積復蒙

聖主洪恩寬宥矜全屢頒

諭旨訓誨諄諄臣每跪讀

恩綸之下感激涕零茲復欽承

聖訓臣愈深敬畏痛自刻責惟有益加勉勵殫竭心力

辦理政務冀贖前愆仰報

高厚隆恩於萬一耳為此繕摺恭謝

天恩謹

奏

覽

雍正十三年六月十三日山西巡撫臣石麟謹

奏為奏

聞事竊照山西省城地方於五月十二等日得雨露足

并各屬於五月初五六等日得雨均霑情形經臣

恭摺奏

聞嗣省城於十七八等日復得雨霑足并據各屬陸續
申報於五月十五暨二十五六等日各得雨四五
六寸及霑足者不等茲省城於六月十二日申時
起至戌時止得雨二寸又於十三日子時起至卯
時止得雨深透霑足當茲黍稷稻粱俱在吐秀含
苞之時得此甘雨優渥滋培深有裨益理合奏

聞以慰

聖懷為此謹

奏

及時得雨深慰朕念

雍正十三年七月十九日山西巡撫臣石麟謹

奏為奏

聞事竊查晉省各屬地方自夏入秋雨水均獲霑足田禾俱各茂盛因屆結實之際雨澤尤關緊要臣時

行查詢其近省太原等府州及省北各府州現在
雨水不缺惟省南平陽府蒲州府解州絳州等處
於七月十五六等日接據各該府州稟稱查所屬
內有自六月下旬起至七月初十雨澤稀少即間
有微雨不能沾濡田禾望雨殊殷現在祈求等語
臣聞之深為憂慮隨自刻責修省即於七月十七
日在省城設壇率同司道等官虔誠祈禱茲省城
於十九日丑時甘雨下降纏綿優渥至於申時已

得雨六寸現在尚未止息且雲氣瀰漫雨澤綿綿
所降必廣除飛飭平蒲解絳等府州將有無得雨
并田禾情形即查明具報俟覆到另

奏外謹先恭摺奏

聞為此謹

奏

交秋逾月節令已屆白露平蒲等處縱得雨亦恐無濟
於事矣

雍正十三年八月初六日山西巡撫臣石麟謹

奏為奏

聞事竊臣前奏平陽蒲州解州絳州四府州屬地方入
秋以後雨澤稀少竝七月十九日省城得雨情形
一摺茲於八月初四日奉到

硃批諭旨臣跪讀之下仰見我

皇上念切民生惟恐雨澤後時致厯

宸衷臣查七月十九日之雨近省及省北各府州屬地

方獲霑足者居多又於二十五六七等日省城暨
各府州復得雨透足其平蒲解絳四府州據陸續
申報七月十九日僅得雨一二寸不等未獲沾濡
復於二十四五六七等日甘霖晝夜連沛纏綿優
渥均獲霑足前此待雨之田禾皆渟然興發現在
長茂秀穗等情臣查平蒲解絳等處地隸省南氣
候較蚤民間播種有早晚二禾早禾秋後即可收
穫前此少雨之隙而早禾已屆收割其晚禾係收

麥後始行播種有渠堰井泉可以澆灌者仍屬茂
盛惟高阜坡地禾苗因雨水愆期未免生發遲滯
今得此膏雨普霑雨後天氣現在暖熱田禾猶得
長養尚屬有濟收成不致缺望統俟收後確查分
數具


奏外所有平蒲解絳等處已經得雨霑足并田禾情
形臣謹恭摺奏

聞上慰

聖懷謹

奏

果如所奏則雨澤猶不嫌遲禾苗仍屬有濟也何喜如之



硃批諭旨卷二百十七之四